

Jesúsnoa Yoikī Fētsa Hebreofo Kirika Kenexō Fomani

Jesús ãfe Apaõxō yoini. Nāskakē nō tāpitiro afe keskaramāki

¹ Efe yora míshtichi, ē mato kirika kenexō fomaí mā tāpinō Jesúsnoa. Taeyoi Epa Niospa ãfe meka nōko xinifo israelifo yoipaoni mēxotaima. Æfe ãjiriõnoa ato yoipaoni. Askatari ãfe namapa ato yoipaoni. Askatari ãfe meka yoimisfoxō ato yoipaoni. ² Akka iskaratā noko yoia ãfe Fakeoxō. Nāskakē nō tāpitiro Nios afe keskaramāki. Æfe Fakeoxō keyokōi nai mēranoafoya mai anoafoyari onifani. Nāskafata ãfe Fake katoni nai mēranoafoya mai anoafoyari nōko xanïfo finakōia inō. ³ Nāfi sharafinakōiaki Apa Nios keskarakōi. Apa Nios afe keskaramāki noko õimani. Nāato keyokōi kexesharamis ãfemekasharaõxō. Askatari nokoõnoax nani nōko chaka noko soaxoxiki a keskara shara noko õi. Nāskakē nōko chaka anā shināima. Nāskata mā otoax nai mēra kani Apa fe xanïfokōi ixiki.

Niospa ãfe ãjirifo Jesús ato finõkōia

⁴ Nāskakē nō tāpitiro Niospa Fāke ãjirifo ato finõkōia. Nāskax Niospa Fake xanïfokōi Jesús.

⁵ Akka Niospakai ãfe ãjirifo yoikī iskafamisma:

Māfi ëfe Fakekōifokī. Ë māto Epaki,
ato famisma. Akka ãfe Fake fisti yoikī iskafani:

Mī ëfe Fakekōi. Nāskakē mī fisti ãto xanïfo finakōia ipanakaki,

ixō yoini. ⁶ Nāskaxō āfe Fakekōi mai ano nīchini. Nāskata āfe ājirifo yoini iskafakī:

Keyokōichi ēfe Fake noikōikāfe. “Mī fāsi sharakōi,”

ixō yoikāfe. ⁷ Nāskata āfe ājirifoōnoa yoikī iskafani:

Ēfe ājirifo oa nefe koshi katiro keskara ē fai, ēfe meka yoinōfo. Nāfori oa chii xoisai keskarafo. Nāskakē nā ē ato yoiai keskafakī afara arisafatirofo,

ixō Niospa yoini. ⁸ Akka afianā āfe Fakeōnoa yoikī iskafani:

Mī ea keskarari. Mīri mī Nioskōi. Mī āto xanīfokōi ipanaka. Mī keyokōi īkikōisharapakenaka. ⁹ Mī afara sharafo noikōimis, nā afara chakafo noikaspayanā. Nāskakē ē mia katoni mī āto xanīfo inō. Akka ājirifo ē ato inimamai. Akka ē mia inimamakōi,

ixō yoini. ¹⁰ Askata anā yoini,

Mīri ea keskarakōi. Mī āto xanīfokōi. Afaa oniyamatai mai yafi nai mī onifakī taefani. ¹¹ Nāskakē nāfo keyokōi mitokomexii. Akka mī fisti keyonakama. Nā rapati mā chapoax keyotiro keskai mai fe nai keyoxii. ¹² Rapati chapokē potatirofo fetsa fena shara fixikakī. Nāskarifiakī mai fe nai anā sharakēma mī anā mai yafi nai pāofakī keyotiro. Anā fenashara faxiki fenashara inōfo. Akka mī fetsatiroma. Mī fisti ipanaka,

ixō Epa Niospa āfe Fake yoini. ¹³ Niospakai āfe ājirifo yoikī iskafamisma:

Mā efe xanīfo ikikai efe ketaxamei. Tsaokāfe, ixokai yoimisma. Akka āfe Fake fisti yoini iskafakī:

Mī efe xanīfokōi ikano nā mia noikaspaifāfe

anā mia afeska fatirofoma mīmāi keyokōi ato īkikē. Nā mia noikaspaifo mī ato ikīxii, ē mia askafaino mī efe xanīfokōi ixii,
 ixō yoini. ¹⁴ Akka Epa Niospa āfe ājirifo yoini noko kexesharanōfo. Fatorafāferi Jesūs Ifofaafomākī afe ipaxakakī. Nāskakē Niospa āfe ājirifo yoini a Ifofaafō kexesharanōfo.
 Nāskakē nō tāpia ājirifo Jesūs finōkōia.

2

*Jesús nokoōnoax nanixakī noko imapakenakākī.
 Nāskakē kachikiri fayamakāfe*

¹ Akka Cristo ājirifo finōkōia. Nāskakē nā meka chanīmakōi Niospa Fakēōna nō nikasharakōitiro, na meka shara kachikiri fayamaxiki.
² Niospa āfe ājirifo nīchini āfe meka yorafo yoitanōfo nōko xinifāfe nikasharanōfo. Akka nikasharayamaifono Niospa ato omiskōimani.
³ Akka taefakī Jesūs yoiyoni nokoōnoax chiponaxiai, nōko chaka noko soaxoxiki nō afe īpaxanō. Nānori ato yoiaito nikakaxō a afe rafemisfāfe noko yoinifo. Akka nō Jesūs Ifofaino, Niospa noko ifitiro. Akka nō nikayamaino Niospa noko ifitiroma. ⁴ Askatari Niospa afara fetsa fetsatapafo tsōa atiroma keskara ato ispapaoni aōxō tāpinōfo āfe meka chanīmakōikē. Askatari āfe Yōshi Shara ato mēra naneni ato katoxō nāfāfe yonokī fetsa fetsafakī yonoxonōfo. Nāskakē nō Niospa meka chanīmara fai.

*Jesucristo nono mai anoax yorakōi ikiyoi oni,
 feronāfakēkōi askafiax Nioskōi*

⁵ Akka Niospa ãfe ãjirifo yoikĩ iskafanima: “Na mai fena anoax mã xanĩfo ixii,” ixõ yoinima. (Nãskakẽ nõ Jesúsnoa nõ shinãmakitiroma nãmãi xanĩfofinakõikẽ.) ⁶ Akka na kirika kenekĩ David yoikĩ iskafani Niospa shinãmanaino:

Epa Niosi, keyokõi mĩ onifani. Akka nõkai afama. Nãskafeke noko noiyana mĩ noko shinãmis, noko kexesharayanã. ⁷⁻⁸ Akka mĩ ãjirifafe noko finõyonifo. Nãskafiano nono mai anoa mĩ noko xanĩfo ima. Nãskakẽ nã mĩ onifanifafe noko nikakõitirofo mímãi noko xanĩfo imasharakẽ,

ixõ keneni. Akka keyokõi nã Niospa onifanifo nõ ãto xanĩfo itiro. Tsoa fetsakai xanĩfo itiroma. Askafiano keyokõichi noko nikakanima. ⁹ Akka mã nõ tãpia Niospa noko noikĩ nono mai ano Jesús nãchini yorakõi inõ. Nãskakẽ ãfe ãjirifafe Jesús finõyonifo. Akka mã nokoõnoax nai omiskõixõ noko chaka soaxokẽ. Epa Niospa xanĩfo finakõi imani, nãskaramãi Niospa fichipaikĩ keyokõi noko noikĩ. ¹⁰ Epa Niospa keyokõi onifani aõnoax keyokõi inõfo. Nãskakẽ ãfe fakefo afe isharapakenakafo. Nãskaxõ ãfe Fake Jesús nãchini nokoõnoax omiskõyonõ nõ afe ipaxanõ. Æfe Fake fisti nokoõnoax omiskõitiro nõko chaka noko soaxoxiki. Nãato Apa Nios ika ari noko iyoano nõ afe ipaxatiro. ¹¹ Akka Jesús ãfe Apa Nios nãri nõko Epa. Nãskaxõ noko chaka soaxona nõ a keskara shara inõ. Nãskaxõ rãfikima noko yoikĩ iskafatiro: “Nafo ëfe fakefo,” ixõ noko yoitiro. ¹² Nã chanãmara faafoõnoa Jesús Apa Nios yoikĩ iskafani:

Epa Niosi, mĩõnoa efe yorafo ë yoisharaxii. Nãskakẽ ato fe mĩõnoax ë fanãixii,

ixō yoini. ¹³ Nāskaxō anā yoikī iskafani:
 Epa Niosi, ē mia chanīmara faaki,
 ixō yoini. Nāskafata anā yoikī iskafani:
 Epa Niosi, nā ea chanīmara faafo mā mī ea inā
 ēfe fakefo inōfo,
 ixō Jesús Apa Nios yoini. Nāskarakōi keneni David.

¹⁴ Nā fakefo apa fistichi ato fakefafiano nā
 yora fistiyata nā imi fistiya ikafo tsoa osiama.
 Nāskarifiai Jesúsri noko keskara yorakōi ipaoni.
 Yorakōi kāinixakī noko nāxoni Satanás yōshi chaka
 nōko ifo iyamanō anā noko namapakenōma.
 Nokoōnoax Jesús naitīa Satanás āfe kerex xateni
 anā noko afeska faxima. ¹⁵ Akka Jesús nokoōnoax
 nayoamano yorafo nō naira ikax ratekōipaonifo.
 Askafiano mā nokoōnoax Jesús naxō noko chaka
 soaxona afe īpaxanōfo. Nāskakē napai nō anā
 ratetiroma. ¹⁶ Akka mā nō tāpia Jesūskai onima
 āfe ājirifo afara ato axoyoi. Askatamaroko
 Abraham āfe fenafo nā chanīmara faafo, Abraham
 chanīmara fapaoni keskafakī chanīmara faifono
 ato afara axosharayoi oni. ¹⁷ Akka Jesús noko
 keskara yorakōi ini. Nāskakē nā nō meemis
 keskarari arifi meepaoni. Yorafāfe noikaspafono
 meepaoni paekōi. Askatari mekafaifono, askatari
 chakafamapaiyafono, meepaoni paekōi. Nāskakē
 nokoōnoa shināi. Noko potaxikima. Nāskakē Epa
 Nios noko kīfixomis noko imasharanō. Akka nā
 Jesús nokoōnoax nani nōko chaka noko soaxoxiki.
 Nāskakē noko Apa Nios kīfixotiro iskafakī: “Epa
 Niosi, ē ato nāxonikī ato chaka soaxōfe nā ea
 chanīmara faifo,” ixō Apa yoitiro. Nāskaxō noko
 Epa Nios kīfixomis xanīfokōi itiro. ¹⁸ Satanás
 Jesús chakafamapaini. Akka Jesús omiskōifikī

afaa chakafanima. Nāskakē nokori Satanás afara chakafamapaiyaito Jesús noko axosharatiro nō afaa chakafayamanō.

3

Jesús Moisés finōkōia

¹ Efe yora mīshtichi, Epa Niospa mato katoni ãfe Fakekōifo mā inō, nāskaxri mā afe xanīfo inō. Niospa Jesús nīchini nokoōnoax nanō. Akka nāatori Apa Nios noko kīfixomis. Akka a ato Nios kīfixomisfo Jesús ato finōkōia. Nāskakē Jesús shināsharakōikāfe. ² Akka a Niospa Jesús yoini keskara, nāskara asharakōini. Nāskatari Niospa Moisés katoni israelifo Egípto mai anoa ato ifinō, askatari ãfe meka shara ato yoinō. Nā Niospa yoini keskarari Moisés asharakōini. ³ Akka Moisésnoa yoisharafitirofono, askatamaroko Jesúsnoa yoisharakōitirofo. Nā pexe sharaōnoa yoisharatirofono, askatamaroko nā pexe famisnoa yoisharakōitirofo. Nāskarifiakī Moisésnoa yoisharafitirofono akka Jesúsnoaroko yoikī finasharakōitirofo. ⁴ Āa pexe itiroma. Akka nā pexe famisto atiro pexesharafakī. Nāskarifiakī Epa Niospa keyokōi onifani. ⁵ Akka Moisés Epa Niospa ãfe yonomati ini. Niospa yoini keskafakī, nāskarakōi ani. Āfe kaifo israelifo ato yoipaoni Niospa meka. Askatari ato kexesharapaoni. Askatari Egípto anoa ato ifixō ato iyoni. Nā Moisés apaoni keskafakī ōikī keyokōichi tāpikōitirofo Epa Niospa ãfe Fake nīchiai afe yorafo ichapakōi ifinō nai mēra afe īpaxanōfo. ⁶ Akka Jesúskai Epa Niospa ãfe yonomatima. Āfe Fakēkōi. Nāskakē afe yorafāfe

āto Ifokōi. Akka tsoamāki afe yorafō ē mato yoinō. Nō Jesús Ifofaxō a noko yoiyoni keskafakī nō manasharai nā anā oaitā, nō kachikiri fayamax nō afe yorakōi nō iki.

Niospa fakefo aōnoax inimakōitirofo anā āto ōiti fekaxtenōma

7-8 Akka Niospa Yōshi Sharapa yoikī iskafani:

Epa Niospa mato yoiāi keskafakī nikasharakāfe. Māto ōiti kerexfayamakāfe Niospa meka nikakaspakī. Māto xinifo keskara iyamakāfe. Māto xinifo ē ifini Egipto anoa. Ē ato ififinino tsōa istoma anoxō ea nikasharanifoma. Askakimaroko Jesús mato yoiāi keskara nikasharakōikāfe. **9** Nā tsōa istoma anoxō māto xinifāfe ea nikakaspapaonifo nā tsōa ūiyomisma ēfe yonoshara ē ato ispfaiaino. Ano afamano a piaifo ē ato ināpaoni. Askatari ano fakamano, ē ato ināpaoni. Ē ato xinia ranā askafaiaino ea nikakaspapaonifo. **10** Nāskakē ē atoki ūitifishkini. Nāskakē ē yoini iskafakī: “Ea nikatamaroko āto ōiti mēraxō afara chaka shināmisfo. A ē ato shināmapaiyai keskarakai tsōa nikafoma.” **11** Nāskakē ē atoki ūitifishkikī ē atoōnoa yoini iskafakī: “Na israelifāfe ea nikakaspakani. Nāskakē a ē ato inimamapaiyai keskafakī ē ato axopakenakama,”

ixō Epa Niospa nōko xinifoōnoa yoini.

12 Efe yora mīshichi, ūisharakāfe. Nōko xinifo keskara iyamakāfe. Māto shinā mēraxō mā Jesús chanīmara fayamax chakakōi mā itiro. Mā askaikai nā Nios nīpanakāfe mā ipanakama.

13 Askatamaroko pena tui yoinōnāsharakī inimama

faatanākāfe nōko Ifoxō shināsharakōixikakī. Afara chakafāfe noko pāratirofoki nō chakafanō. Akka nō nikaxō nō anā shināsharatiroma. Nōko ōiti chakakōi itiro. Nāskakē ato nikayamakāfe. ¹⁴ Akka nō taefakī Jesús chanīmara fakōini keskafakī eneyamax nō afe ipaxatiro. ¹⁵ Akka nā kirika keneano iskakī ē mato yoinō,

Epa Niospa mato yoiai keskara fisti nikasharafafāikāfe. Māto xinifāfe Epa Nios nikakaspakakī āto ōiti kerexkōi fapaonifo. Nāskakē ato keskara iyamakāfe. Māto ōiti kerex fayamakāfe. Nāskax nikayospa iyamakāfe, ixō Niospa meka yoikī kenenifo.

¹⁶ Akka, ¿tsoafo Niospa tsekanimē Egipto mai anoa āfe meka nikakaspakakī kachikiri faifono? Akka keyokōi nōko xinifo Moisés Egipto mai anoa iyoni. Nāfāfe Nios nikakaspapaonifo. ¹⁷ Akka, ¿tsoafoki Epa Nios ūitifishkinimē cuarenta xinia mā akax? Nā nikakaspayanā afara chakafaifoki ini. Nāskakē Epa Niospa tsōa istoma anoxō keyokōi ato namapakeni. ¹⁸ Akka, ¿tsoafo Niospa yoinimē iskafakī? “A ē mato inimamapaiyai keskafakī ē anā askafapanakama,” ixō yoini. Akka nā nikayospa ato yoikī askafani. ¹⁹ Akka Epa Nioskai tsōa chanīmara fanima. Nāskakanax a Niospa ato imapaiyai ano tsoa ikinima. Nāskakē tsōa anoxō tenenima inimayanā.

4

¹ Akka Epa Niospa noko yoiyoni iskafakī: “Mā ea Ifofaino ē mato anā inimamatiro. Akka mā ea Ifofayamakē ē mato inimamatiroma,” ixō noko yoiniki. Nāskakē keyokōichi nō Ifofanōkāfe.

² Epa Niospa noko yoia: “Ē mato ifipai,” noko fani. Nāskarifakī Epa Niospa nōko xinifo yoikī iskafani: “Ē mato ifipai mato inimamapaixikī anā mā fekaxtenōma,” ixō ato yoini. Ato askafafaino tsōakai nikasharanima. Kaxpakōi Epa Niospa ato yoini. ³ Akka Niospa Moisés shināmanaino iskafakī kirikaki kenekī yoini:

Ea nikayamaifono ē atoki õitifishkikī. Nāskakē ē ato fāsikōi yoia iskafakī: “Mā ea nikayamaino ē mato mai shara fetsa ano imapakenakama anoax mā isharanō,”

ixō ato yoini. Akka Epa Niospa keyokōi onifani. Mā keyokōi askafakī fetsaxō teneni. Nāskafakīri Niospa fichipai afe yorafo isharanōfo anā fekaxteyamanōfo. Iskaratīari afe yorafo isharamapai afe isharapakexanōfo. Akka nōa nō Nios chanīmara faino, Epa Niospa noko ifisharai nō inimapakexanōfo. ⁴ Akka kirikaki Moisés keneni pena tenetiōna yoikī. Iskafakī keneni:

Seis nia yonokī Epa Niospa keyokōi onifani.
Nāskaxō pena fisti teneni,
ixō keneni. ⁵ Askatari anā kirikaki keneni, iskafakī yoikī:

Efe isharapakenakafoma,
ixō kirikaki kenekī yoini.

⁶ Askafiano ranāri afe isharapakenakafo. Akka nā Niospa meka nikakaspaifo afe ipanakafoma.

⁷ Nāskakē Niospa shināmanainori chipo David kirika kenekī yoini iskafakī:

Iskaratīa Niospa meka nikakī māto shināmā shināsharakāfe. Anorima shinākakima, ixō David yoini.

⁸ Mā Moisés naano, Josué israelifo iyoni Canaán mai ano isharanōfo. Nāskafono Niospa iskafakī yoini: “Nā ea Ifofaafó efe nai mēra isharapakenakafo,” ixō yoini. ⁹ Nāskakē mā nō tāpia nō Ifofaax, nō afe isharapakenaka. Epa Niospa afe yorafó inimamasharapai isharapakexanōfo. ¹⁰ Epa Niospa keyokōi onifaxdō inimayanā teneni. Nāskarifiai nō Epa Nios ano kaax a nō iyopaoni keskara nō anā itiroma, Niospa noko inimamasharakōiaino. ¹¹ Akka fekaxfiano nō Nios Ifofakōitiro afe isharapakexakī. Akka nōko xinifāfe nikayamaito Epa Niospa ato mai shara ināpaifikī ato inānima. Nāskakē nōri ato keskara ipaima.

¹² Epa Nios nipanaka. Nāskarifiai āfe meka keyonakama, mitsisipakōi. Akka keno ikikōichi nami potexō āfe xaki mēra nō ōtiro. Nāskarifiai Epa Niospa meka fāsi finakōia. Āfe meka shara nō mēra ikano aōxō nō tāpitiro nō shara ikamāki askayamai nō chakamāki. ¹³ Epa Niospa keyokōi tāpia nō ōtatiroma. A nō afara shināxō nō amis keskara keyokōi tāpikōia. Akka nōri tāpia a nō amis keskara. Nāskakē nō Nios pāratiroma.

A Nios ato kīfixomisfo Jesús ato finōkōia

¹⁴ Akka Jesúsfí Niospa Fakēkī. Askatari noko Nios kīfixomis. Nāatofi a Nios ato kīfixomisfo finōkōiaki. Nāskax nai mēra Nios ano kani. Nāskakē nō kachikiri fatiroma nikakōisharayanā. ¹⁵ Nāatori meemis a Satanás noko afara chakafamapaiyai keskara. Nāskakē nāato tāpia a nō meemis keskara fekaxkōi. Akka Satanás Jesúsrí afara chakafamapaini. Nāskafekē Jesús nikanimá. Nāskakē nokori axotiro. ¹⁶ Nāskakē nō Nioski ranokima nā nō

yoipaiyai keskara nō yoitiro. Nō yoiaito Niospa noko noikī noko afara axosharatiro.

5

¹ Ë mato yoinō afeskax ato Nios kīfixomis xanīfo itirofomāki. Nā Niospa ato katoato nāato noko kīfixonō. Nā Niospa katoa noko keskara yorari itiro. Nāfi Nios noko kīfixomis xanīfo itiro. Nāskakē yorafāfe Epa Nios aicho fakakī a Nios ato kīfixomisto āfe xanīfo afara ināmis atori Nios inānō. Askatari yorafāfe āto chaka soapaikakī nā yoinā ina fexomisfo retexō ato koofaxonō Epa Niospa āto chaka ato soaxonō. ² Akka nāri noko keskarari nāatori afara chakafatiro. Nāskakē tsōa tāpisharayamakī, shināsharakima afara chakafaino, nā xanīfāfe tanaima isharaxō ato axosharatiro. ³ Nāskaxō yorafāfe nā yoinā inafo ināino nāato retexō koofakī Epa Nios ato kīfixomis Epa Niospa āto chaka ato soaxonō. Nāskatari āri āfe yoinā ina retexō koofamis ari Epa Niospa chaka soaxonō, a noko axomis keskafakī. ⁴ Akka ākai tsoa katometiroma Nios ato kīfixomis xanīfo ixii. Nios fistichi ato katotiro Aarón ani keskafakī. ⁵ Nāskarifiai Cristo aari katomenima Nios ato kīfixomis xanīfokōi ixiki. Akka Apa Nios fistichi yoini iskafakī:

Mī ēfe Fakekōi. Nāskakē mī fisti āto xanīfo finakōia ipanakaki,
ixō yoini. ⁶ Askatari anā iskafakī yoini:

Mīfi ato Nios kīfixomis xanīfo ipanakaki, nā xanīfo Melquisedec ipaoni keskara,
ixō Apa yoini.

⁷ Jesús nono mai ano ikax, mā chaima naxiki omiskōikōini. Nāskaxō fāsikōi mekayanā oaiayanā

Apa kīfīni iskafakī: “Epa, mī keyokōi tāpia. Ea mīa ifipaikī ea mīa ifitiro ē nanōma,” ixō yoini. Mēxotaima nā Āpa amapaiyai keskara fisti shinākī Jesūs āfe Apa nikakōini. Nāskakē āfe Āpa tememakōini axosharakōiyanā omiskōiaino. ⁸ Akka Jesūs Niospa Fakekōifiax omiskōini. Omiskōifikī Apa nikakōini. ⁹ Nokoōnoax omiskōifikī Apa Niospa yoiai keskara nikakōini. Nāskaxō a nikaifo ato ifipakexakī. Nāskax noko ifimis sharakōi imis. ¹⁰ Epa Niospa āfe Fake Jesūs katoxō yoikī iskafani: “Mīfi nā Melquisedec keskara ikikai. Nāskakē a ea ato kīfixomisfāfe āto xanīfokōi mī ipanakaki ato īkipakexakī. Nāskaxō a eōnoa ato kīfixomisfo xanīfofori mī ato finōkōinīfōfānakī,” ixō Āpa yoini.

*Ōisharakōikāfe. Mā Jesūs kachikiri faa fāsi
mesekōi itiroki*

¹¹ Ē mato yoia Epa Niospa Jesūs katoa a noko Nios kīfixomis afe xanīfo finakōia ixii. Akka nāōnoa ē mato fetsa yoisharapai. Nāskakē ē mato anā yoisharatiroma māmāi fenāmāshta tāpiaino. ¹²⁻¹³ Akka mā Niospa meka nikakī mā mā xinia ranā aka. Nāskakē tāpikōixō mā ato yoikerana. Akka mākai tāpisharama. Akka a mā taefakī Niosnoa mā ato yoiyoni mā mā shināmakia. Nāskakē mato anā tāpimanōfo mā ato fenai. Nā fake yome chocho afiai yosiaima keskarakōifo, mā. Akka fake yomēkai afaa piyotiroma. Nāskarifiakī māri Niospa meka tāpisharaima. Nāskakē mā tāpiama fato sharamākī fatofori chakamakī. ¹⁴ Akka nō pena tii Niospa meka ūifafāikī nō tāpikōiax isharakōitiro māmāi nō tāpiax fato sharamāki, fato-fori chakamāki.

6

¹ Akka nōkai fakefo keskarama. Fakefāfekai afaa tāpisharafoma. Akka nōroko tāpisharakōia. Akka fetsa ē mato yoipai a ē mato yoiyomis keskara anā ē mato yoima. Mā nō tāpia a nō afara chakafamis. Nāskakē nō rāfikōyanā nōko chaka shināmakitiro. Nāskaxō nō Nios Ifofaino noko chaka soaxotiro nō afe Ipaxanō. ² Mā nō tāpia noko fētsa mao-tisafaino keyokōi tāpitirofo mā nōmāi Nios Ifofaino. Askatari nō tāpia noko Nios kīfixoyanā āto mifi noko māmātirofo Niospa Yōshi Sharapa noko imasharanō. Nāskatari mā nō tāpia nō Jesús Ifofaax nō naax nō anā otoxiai. Akka a Jesús nikakaspam-ifo Niospa a omiskōipakenakafo mēra ato potaxii. Nāskakē nāfo mā nō tāpikōia. ³ Nāskakē a Niospa fichipaiyaino afara fetsafori nō tāpitiro.

⁴ Nāskakē nō Jesucristoōnoa meka shara nikaxō chanīmara faax mā naax Nios fe nō ipaxatiro. Nāskatari Niospa Yōshi Shara noko fe iki. ⁵ Nāskakē nō Niospa meka tāpisharakōiaino a Niospa afara shara noko yoiai nō atiro. Askatari Niospa afara sharafo noko famapai afara sharafo nō atiro, āfe Yōshi Sharaōxō. ⁶ Nāskakē keyokōi nō afo tāpifixō nō Niospa Fake kachikiri faxō chakafakī mekafaxō, nō anā Ifofatiroma mā nōmāi chakafaxō a noko Ifimis. Anā tsōa noko ifitiroma. ⁷ Akka ē mato yoinō nikakapo. Oi ikaino mai mechanatiro. Nāskakē tare anoax fanafo foaisharatiro. Nāskakē a tare yonomisfo inimatirofo fanafo foaisharaino Niospamāi imasharaino. ⁸ Akka nā tare fetsa chaka anori oi ikaino, fanasharafo foaitiroma. Moxa chakafo fisti foaitiro. Nāskakē koofatirofo nā fanachakafo kooi mitokomenō. Nāskarifiakī fētsa Niospa meka

shara nikafafāifikī Nios chakafakī mekafaito nā keskarafo Niospa nā omiskōipakenakafo mēra potaxii. Nō tare shara keskarakē Epa Nios nokoki inimatiro. Akka nō tare chaka keskarakē Epa Nios nokoki inimatiroma. Nāskakē noko omiskōimaxii.

Akka mā nō tāpia nō Jesús chanīmara faax nō isharakōitiro

⁹ Efe yora mīshtichi, mē matoōnoa tāpisharakōia. Mākai ato keskarama. Akka Jesús Ifofaax oa mā fāi kai keskara mā Nios ari kai. ¹⁰ Akka Epa Nios sharakōi. Afaa chaka shināmismá. A mā sharafamis Epa Niospa tāpia, shināmakima. Askatari mā Nios noikī a chanīmara famisfo mā ato axosharamis. Nāskakē Epa Nios shināmakima. ¹¹ Akka Epa Nios kachikiri faxoma a mā akai keskararifakī, ato sharafakī mēxotaima Ifofasharakōikāfe, “Nioski nokoaitīa nō afe isharapakexakī,” shinākōikī. ¹² Akka Epa Niospa meka shināmakiyamakāfe. Epa Niospa fetsafo yoini iskafakī: “Mā ea Ifofakī mā ea manasharaito ē mato afara shara ināxii,” ixō ato yoini. Nāskarifiakī māri manasharakāfe, Jesús kachikiri faxoma. Māri afara shara fixikakī.

¹³⁻¹⁴ Niospa nōko xini Abraham yoiyoni iskafaki: “Ēkīa mī Nios. Ea tsōa finōtiroma. Ramashara ē chanīmismá. Ē mia yoinō mī tāpisharakōinō. Ē mia axosharakōikai mī fenafo ichapakōi inōfo. Akka mīkai ato tanātiroma mī fenafomāi ichapakōikē,” ixō Niospa Abraham yoiyoni. ¹⁵ Nāskakē Abraham fena fenakima manakōipaoni. Nā Niospa yoiyoni keskarakōi fakī Abraham āfinī fake fini. Āfe fake Isaaca. ¹⁶ Akka fētsa noko yoikī iskafatiro: “Ē mia pāraima ēfe xanīfāfe mā ea ōi. Nāskakē

nā ē mia yoiai keskara ē mia axoxii,” ixō noko yoitiro. Nāskakē nō tāpitiro nokokairoko pāraito. **17** Nāskarifiakī Niospa noko tāpimapai āfe meka chanīmakōi. A noko yoiyoni keskara afeskaxō anā fetsafatiroma. Nāskaxō ato yoini iskafakī: “Ē Nioskōi. Tsōakai ea finōtiroma. Nāskakē nā ē mato yoiai keskafakī mā ea chanīmara fatiro,” ixō ato yoini chanīmara fanōfo. **18** Chanīma Niospa a noko yoiyoni keskara mā noko ūimasharakōia mā nō tāpia. Nāskakē noko pāratiroma. Noko yoini iskafakī: “Ēfe Fake ē matoki nīchixii māto chaka mato soaxonō mā efe ūpaxanō,” ixō noko yoini. Nāskakē nō chanīmara fai nā noko yoiyoni keskara āfe Fakeōnoax Epa Nios ano nō afe ipaxatiro. **19** Nāskaxō anā afaa fetsa nō shinātiroma. Nios makinoakai tsōa noko potatiroma. Nāskakē Epa Nios fe nō ipanaka. **20** Jesús nai mēra kani nō aōnoax chipo kanō. Nārixō xanīfokōixō noko Apa Nios kīfixōfafāini Melquisedec ipaoni keskaraxō.

7

Nā Melquisedec yora Nios kīfixomis ipaoni

1 Akka Melquisedecnoa ē mato yoinō afe keskara ipaonimāki. Melquisedec xanīfo ipaoni pexe rasi āfe ane Salem anoax. Askatari ato Nios kīfixomis ipaoni. Nā cuatro xanīfofo yometso chakafo ato ūchoxō Abraham āfe pia ifitani, afama mīshtifoya oaino, nā Melquisedec Abrahamki nokoni. Nāskata Melquisedec Abraham Nios kīfixoni axosharanō. **2** Askafaito ūikī Abraham Melquisedec nā afama mīshti fitanai ranāri ināni. Nā Melquisedec āfe ane “Asharakōimis,” famisfo. Nā Salem pexe rasi anoax xanīfo ipaoni. Nā Salem

ãfe ane “Isharakõi,” fapaonifo. ³ Nã Melquisedec ãfe epa yafi ãfe efa nõ tãpiama. Æfe xiniforikai nõ tãpiama. Askatari nõ tãpiama a fake kãinitiã. A nanitãri nõ tãpiama. Nãskakẽ nõ Melquisedec shinãkĩ Niospa Fakeri nõ shinãtiro. Nãato noko Niosnoa kãfixomis xanïfo ipanaka.

⁴ Efe yora míshtichi, shinãkapo. Melquisedec xanïfokõi ipaoni tsoa keskarama. Akka Abraham israelifãfe taefenai ãto xini iyopaoni. Abraham sharakõi ipaoni. Askafixõ Abraham Melquisedec afama míshti inãni ãfe afaya yama fækë. Akka Melquisedec xanïfo finakõia ini Abraham sharafiano. ⁵ Israeli xoko fetsa fo Leví ãfe fenafo Epa Niospa katoni. Nãfafe ãto kaifo Epa Nios kãfixopaonifo. Nãskakẽ Moisés yoini keskafakĩ nã ato Nios kãfixomis fo kori fisti rasi ato inãpaonifo. Askatari ãto afama míshtifori ato inãnifo ãto kaifafe. ⁶ Akka Melquisedec Leví ãfe fenayama fiano Abraham ãfe afama míshtifo fetsa fetsatapafo inãni. Nãskakẽ Melquisedec Abraham yoini iskafakĩ: “Abraham, mia Niospa axosharai,” ixõ yoini. ⁷ Chanïma, keyokõi nõ tãpikõia fëtsa ato finõkõixõ ãfe mekapa ato shara fatiro. Nãskakẽ nõ tãpia Melquisedec Abraham finõkõia. ⁸ Nãskakẽ nã israeli xoko fetsafafe nã Leví fenafo afama míshti ato inãfinifono nãfo mã nai keyonifo. Akka Melquisedec Abraham nã afama míshti fini. Akka Niospa meka yoikĩ kenenifo Melquisedec iskaratãnia keškara. ⁹⁻¹⁰ Leví fenafafe ãto xini Abraham ipaoni. Nãskaxõ Abraham Melquisedec afarafo inãino Leví fafe akairi inãi keskafanifo. Nõ tãpiama afetãra nani. Nãskakẽ nia keškara nõ famis. Nã Abraham Melquisedec afarafo inãitã

Abraham ãfe fena Leví anokai fakeama ini. Chipo Leví fakeni. Nãskakẽ nõ tãpitiro Melquisedec fistichi ãto xini Abraham yafi ato finõkõia.

11 Efe yora mïshthici, shinãkapo. Epa Niosxõ Moisés noko yoini keskafakĩ Leví fenafäfe noko Nios kïfixomisfäfe noko ifitirofono Niospa ãfe Fake nïchikeranima Apa Nios noko kïfixomis inõ. Cristokai Leví ãfe fena Aarón keskarama. Nã Cristo Melquisedec keskarakõi. **12-14** Akka tae fenai Leví ãfe fena Aarón ini. Nã Aarón yorafo ato Nios kïfixomis ini fetsafäfe ãto xanïfo. Akka nõko Ifo Jesúskai Leví ãfe fenama, xoko fetsa ini. Nãskax Aarón keskarama. Akka nõko Ifo Jesús Judapa fena. Nã Levipa chipoko Judá. Akka, “Judapa yorafäfe yorafo ato Nios kïfixomisfo itirofora,” ixõ Moisés yoinima. Askafiano Niospa ãfe Fake Jesús nïchini yorafo ato Nios kïfixomis inõ. Nãskatari a Moisés yoini keskara Epa Niospa fetsafani.

15 Nãskakẽ anã õ mato mëstekõi yoisharapai. Iskaratĩa xafakãkõi nõ tãpishara Nios afara fetsa yoini keskara noko Nios kïfixomis ãfe fena Jesús, Melquisedec keskara nokoki nokoni. **16** Akka Moisés yoini keskarakõi Leví ãfe fenafo fisti ato Nios kïfixomisfo itirofoki. Jesúskai Leví fenaxoma a Moisés yoini keskaraõnoax noko Nios kïfixomis itiroma. Askatamaroko Niospa Jesús katoni noko kïfixomis inõ. Æfe sharaõxõ Epa Niospa Jesús ofani. Anã nanakama. Nãskax noko Nios kïfixomis ipanaka Niospa sharaõxõ. **17** Nãnori Niospa yoionyi David Jesucristoõnoa kenekĩ iskafani:

Mĩ Melquisedec keskara. Nãskaxõ mĩ yorafo Nios kïfixomis ipanaka,
ixõ keneni. **18-19** Nãskakẽ a Moisés yoini keskarakai

nō anā ifofaima. Nokokai imasharatiroma. Askatari nōko chaka noko soaxomisma nō Nios fe īpaxanō. Akka Jesús ãfe meka askarama. Æfe meka sharafinakōia. Epa Niospa Fake nokoki nīchini aōnoax nō afe ipanaka.

20-21 Akka Epa Niospa ãfe Fake yoini keskafakīkai Leví ãfe fenafo anori yoinima. Niospa yora shināmanaino iskara keneni, Niospa ãfe Fake Jesús yoikī iskafani:

Na meka ē mia yoiai chanīmakōi. Nāskakē ē anā fetsapakenakama. Ë yorafãfe ãto Ifokōi. Nāskakē a ē mia yoiai keskafakī yorafo mī ato ea kīfixomis ipanaka,

ixō Epa Niospa ãfe Fake yoini. **22** Akka Apa Niospa nānori yoinikē nō tāpitiro Jesúsnoax Nios fe nō ipaxatiro. Akka Moisés meka askarama. Aōnoax Niospa yorafo nō itiroma. Akka Epa Niospa Moisésxō Leví ãfe fenafo yoini keskara sharafiano akka ãfe Fake Jesús yoini keskara sharafinakōia.

23 Akka a ãto kaifo ato Nios kīfixomisfo ichapafofiax afó natirofo. Tsoa nīpaxatirofoma. Mā fetsa nano fetsari katotirofo atori ãfe yorafo Epa Nios kīfixomis inō. **24** Akka Jesuskai ato keskarama. Nāfi nīpanakakī nāato noko Epa Nios mēxotaima kīfixomis ipanaka. **25** Nāskakē Apa Niosxō noko ifitiro nō afe ipaiyaito nokoõxō Apa Nios yoifafāini iskafakī: “Epa Niosi, ē ato nāxoniki, ato chaka soaxõfe. Nāskaxō a mī ika ano ato imafe,” ixō nokoõxō Apa yoimis. Nāskakē a nokoõnoa Apa yoia keskafakī noko nāskakōi faxoxii nō afe īpaxanō. Nāskaxkai nō fenopakenakama.

26 Akka nā Jesúsfi noko Nios kīfixomis xanīfokōikī. Apa Nios keskara sharafinakōia. Fetsafo finōkōia.

Tsōakai aōnoa afaa chaka yoitiroma. Aatokai afaa chaka shināmisma yora chakafo keskarama. Nāskaxō Apa Nios ika anoafori ato finōkōia. Nāskaxō a nō yopaifo noko axosharatiro. ²⁷ Akka a ato Nios kīfixomis xanīfo fetsafo keskarafoma. Taeifikā afāfe pena tii yoinā ina retepaonifo Epa Nios inākakā ato chaka soaxonō. Nāskakē Niospa mā ato chaka soaxonano yora fetsafāferi ato yoinā inafo inānifo, atori Epa Niospa chaka soaxonō. Akka Jesūskai ato keskarama. Jesūs ato finōkōia. Nāskakē Jesūs nai fistini noko chaka soaxonano Epa Nios fe nō ipaxatiro. ²⁸ Akka Epa Niosxō Moisés yoini keskafakā yorafoōnoa Epa Nios ato kīfixomisfo inōfo āto xanīfofo katonifo. Akka nāfofi noko keskarafori nāfāferi afara chakafamisfo. Nāskakē Niospa yoiyonī keskafakā āfe Fāke Jesūs chipo katoni nokoōxō Nios kīfixomis īpaxanō. Aatokai afaa chakafamisma. Isharakōimis.

8

Epa Niospa meka fenasharakōi yoini Jesūs noko nāxonō nōko chaka noko soaxoxii

¹⁻² Akka nā sharafinakōia nō yoiāi nāfi Apa Nios xanīfokōi ika ari afe ikaki. Nāskakē nō afara yoipaiyaito nokoōxō Apa yoipakenaka. Nāatofi noko Apa Nios kīfixomis xanīfokōikī. Nāskakē a ika arikai tsōa afaa fetsa onifanimā. Akka Nios fistichi onifani. Nāskakē ariax Apa fe nokoōnoax mekakakāini. Nā ika ari nai mēra anoa a anoxō Nios kīfiti pexefā keskarakōifiax finakōia. Nāskakē nā ē mato kenexona keskara xafakīakōi mā tāpitiro.

³ Nā ato Nios kīfixomis xanīfokōi inōfo Niospa ato katoni afarafo yorafāfe Nios inākata finōfo.

Askatari yoinā inafo fixō retekaxō koofaxō ato kīfixonōfo āto chaka ato soaxonō Niospa ato katoni. Nāskakē nā Jesús, noko Nios kīfixomisto, nāatori Nios ināni. Yoinā ina inānima. Askatamaroko āa noko nāxoni nōko chaka noko soaxoxiki. Āfe Āpa amapaiyai keskara ani. ⁴ Moisés yoini keskafakī Leví āfe fenafos israelifāfe ato Nios kīfixomis itirofo yoinā retekaxō ato Nios ināxoxikakī Niospa ato chaka soaxonō. Akka Jesúskai Leví āfe fenama. Nāskakē Jesús nono mai ano ixō nokoōxō Apa Nios kīfimis ikeranama. Akka nai mēra ixō noko kīfixomis, Niospa ato katoano. ⁵ Akka nono mai anoxō nā Leví fenafāfe a anoxō Nios kīfiti karapa pexe mēraxō yonopaonifo. Nānoxō āto kaifo israelifo tāpimapaiakakī Nios ika ari afe keskaramākī tāpinōfo. Askafixō askarakōi tsōa tāpiyonima. Nāskakē Epa Niospa Moisés yoini iskafakī karapa pexe fayoamano: “Ē mia yoiai keskafakī a anoxō ea kīfiti karapa pexe fafe. ¿Mā mī shināimē ē mia machi anoxō tāpimana keskara nāskakōi fafe karapa pexe fakī? Nāskakē a yonomisfo tāpimafe nā ē mia yoiai keskarakōi fanōfo,” ixō Epa Niospa Moisés yoini. ⁶ Akka Niospa āfe Fake Jesús yoini keskarato a Moisés yoini keskara finōkōia. Nāskakē Jesús Apa ika arixō nokoōxō Apa Nios kīfifafāini. Akka Leví fenafāfekai askafapaonifoma. Epa Niospa āfe Fake Jesús yoiyoni keskarakōi ato yoimisma. Akka nā ato yoiyoni keskara sharafiano nā āfe Fake Jesús yoini keskararoko sharafinakōia.

⁷ Niospa Moisés yoini keskara nō nikasharakōixō nō afara chaka nō fakeranama. Akka nō nikasharakōima. Nāskakē Epa Niospa

aõxõ noko ifitiroma. Nãskakẽ noko fetsa yoini iskafakĩ: “Êfe Fafe ë nõchixii mato nãxonõ mato chaka soaxonõ. Mã Jesú Ifofaino ë mato ifixii,” ixõ Epa Niospa yoini.⁸ Akka Epa Niospa Moiséssõ yoini keskarakai tsõa askara nikasharakanamax nõko xinifo nikayospakõi inifo. Nãskakẽ nõko Ifo Niospa yoini iskafakĩ:

Ê chipo na efe yorafo israelifo yafi Judapa ãfe fenafo meka fena shara ë ato yoixii. Nã ë ato sharakõi axõai keskara ë ato õimaxii.⁹ Ê ãto xinifo Egipto anoa iyoni. Nãskaxõ ë ato yoisharani ëfe meka nikasharaifäfe ato kexe-sharafafäixikõ. Ê ato yoisharafaino ëfe meka kachikiri fanifo. Nãskakẽ ë ato potani. Akka a ãto xinifo ë ato yoini keskarakai ë ãto fenafo askara ë yoixiima. Askatamaroko ëfe meka fena shara ë ato yoixii ea nikasharanõfo.¹⁰ A ë israelifo yoixiai kene fistiõxõ ë ato tãpimaxima. Askatamaroko ãto shinã mëra ëfe meka shara ë nanexii ãto õiti mëraxõ a kirika kenea keskara sharaõxõ shinãsharanõfo. Nã ë ato yoiiai keskakõixii shinãsharaxikani. Nãskakẽ ë ãto Epa Nioskõi ixii. Akka afo efe yorafo ixikani.¹¹ Akka anã fisti rasichi ato tãpimaxikanima. Keyokõichi ea tãpixikani. Yorafo afamafäferi ea tãpiaifono, xanõfofofäferi ea tãpikõixikani. Nãskakẽ anã eõnoa tsõa ato tãpimaxima akõi keyokõichi mä ea tãpikõiafono.¹² Ê ato chaka soaxoxii afara chakafafiaifäfe. Nãskaxõ a afara chakafamisfo ë anã shinãpakenakama,

ixõ Niospa yoini.¹³ Nãskakẽ Niospa anã ato yoini iskafakĩ: “Meka fena shara ë mato yoinõ,” ixõ ato yoini. Akka a Moisés ato yoini keskarakai anã tsõa

shinātiroma. Nā Moisés ato yoini keskara meka xinikōi. A mekakai anā tsōa shināpakenakama. Nāskakē nā meka shināmakipakenakafo.

9

Karapa pexe kene fetsa mēraxō Epa Nios ato kīfixopaonifo. Akka iskaratīa Jesús noko kīfixomis Apa Nios ika arixō

¹ Ë mato yoinō afe keskara yorafo ipaonifomakī. Akka Epa Niospa Moisés yoini afeskaxō nono mai anoxō afe yorafo ato Nios kīfixotirofomākī Niospa ato chaka soaxonō. Akka karapa pexe fanifo a mēraxō Nios kīfinōfo. ² Akka a karapa pexe fanifo mēra kene rafe ini. Nā kene rekētana mēra siete rāpari oro otatia metax keskara ini. Askatari mīsari a mēra ini. Nā mīsa kamaki mēxotaima doce pāa fapaonifo. Nā kene rekētana anenifo iskafakakī: “Nios chaimashta ika,” ixō anenifo. ³ Akka karapa pexe fanifo mēra sama namikōi nakirafekōi potexō xītia ini. Nā kene chikaya anenifo iskafakakī: “Nono Nios ikōina,” ixō anenifo. ⁴ Nā kene rekētana ketaxamei mīsa kafāshara oroya taxta fanifo ini. A kamakixō nakas potoshara kooati ipaoni. Nāskatari kene chikaya fetsa mērari kafo oroya taxtafanifo ini. Nā kafo mēra pāa keskara āfe ane mānā kecho oro mēra nanea ini. Akka Aarón āfe chatiri nā kafo mēra naneyoamano Niospa nā Aarón āfe chati charofo onifayoni. Nāskata Aarón āfe chati chipo kafo mēra naneni. Nāskatari Niospa Moisés āfe meka makexki kenexō ināni nikānōfo. Nā makex para Niospamekaya nā kafo mēra nanea ini. ⁵ Nāskakē nā kafo māmākīa Niospa āfe ājiri keskara raferi

nia ini. Āto peta rafeta kafo fepoafō keskara ini. Nāskakē nā Niospa āfe ājiri keskara rafeoxō nō tāpitiro Nios fāsi sharakōikē nōko chaka noko soaxomis. Askafiano akka nafoōnoakai ē mato iskaratīa yoitiroma.

⁶ Nāskakē nā Nios kīfīti karapa pexe kene rekētana mēra a ato Nios kīfixomisfo mēxotaima ikipaonifo anoxō nakas potoshara koofaino ato Nios kīfixoxikaki. ⁷ Akka a kene fetsa mērari tsoa ikitiroma ipaoni. Nā ato Nios kīfixomis xanīfo finakōia fisti ikipaoni. Xinia fisti ata ikipaoni. Nāskatari imimais ikipaonima. Yoinā imiya ikipaoni nā imi Epa Nios ināxikī āfe chaka soaxonō, askatari afe yorafori ato chaka soaxonō. ⁸ Nāskakē Niospa Yōshi Sharapa xafakā noko tāpimani. Akka nā karapa pexe iyoano āfe kene fetsa mēra tsoa ikipaonima. Nā ato Nios kīfixomis xanīfokōi fisti ikipaoni Nios fe mekaxiki. Yorafo Epa Nios fe mekayoxoma, Nios ato kīfixomis xanīfo fisti yoiyopaonifo. ⁹ Nāskakē nā ipaonifoōnoa iskaratīa noko shināmatiro Moisés ato yoini keskafakī. Karapa pexe ano yoinā ina retexō ināpaonifo Niospa āto chaka ato soaxonō. Askafikanax isharapaonifoma afara chakafakaxō shinātaifapaonifo. ¹⁰ Akka Moisés ato yoini keskafakī a ato Nios kīfixomisfāfe nāskakōi fanifo. Nāskaxō afara shara fetsafori ato tāpimani Moisés meka. Afara pita, afara ayata mā fatiro ato fani. Askatari afaari mā pitirōma, afaari mā ayatiroma ato fani. Askatari ato tāpimani afeskax mechokometirofomāki Epa Niospa ato nikakōinō. Akka askafiaifono afāfekai ato chaka soaxokōitirofoma. Cristo oyoamano nānori Niospa

ato yoiyoni. Nā Cristo naitĩa aõxõ keyokõi Niospa fetsafani. Nãskakẽ nõ Jesús Ifofaino, Niospa nõko chaka noko soaxotiro. Nãskakẽ a Moisés yoini keskara anã tsõa ifofasharatiroma ãfe chaka soapaikĩ.

¹¹ Akka Cristo mã anã nai mõra kaax, noko Nios kífixomis xanõfokõi ini. A Niospa noko yoiyoni keskara noko inãmis. A karapa pexe anoxõ a ato Nios kífixomisfâfe ato Nios kífixopaonifo yorafâfe anifo. Akka Jesús noko kífixomis ano sharafinakõia Nios fistichimãi nai fanino. ¹² Akka Cristokai karnõro imi fota fakka fakeshtari fonima. Askata-maroko nokoõnoax nakõ ãfe imi foax ïkisi Apa Nios ari kani. Nãskaxkai anã Jesús nanakama. Nãskaxõ nõko chaka noko soaxonano ãfe Apa Nios ari nõ katiro. ¹³ Akka chanõma, karnõro yafi fakka retekaxõ ãfe imi fíkaxõ nã karnõro koofakaxõ ãfe chii mapoya nã imi osikaxõ saa saa anifo Epa Niospa ato chaka soaxonõ anã choshta keskara iyamanõfo. ¹⁴ Akka Cristokai afaa chakafamisma. Nãfi sharafinakõia. Niospa Yõshi Shara a nõpanakato Jesús shinãmani. Nãskakẽ Apa yoini iskafakĩ: “Epa, õ atoõnoax naikai. Nãskakẽ õfe imi foano eõxõ mõ ãto chaka soaxotiro mefe yorafo inõfo,” ixõ Apa yoini. Akka a nõ Nios inimamapaikõ nõ shinãpaoni keskara nõ anã shinãima. Akka iskaratĩa nõ Nios inimamapaikõ nõ nikasharakõitiro. Nã Nios nõpanaka sharafinakõia.

¹⁵ Akka a Moisés ato yoini keskara sharafiano tsõa nikapaonima. Afara chakafapaonifo. Nãskakẽ nã afara chakafapaonifo keskara Cristo fistichi ato chaka soaxotiro. Akka a Moisés yoipaoni keskara anã ato yoitiroma. Nãskakẽ

Cristo oni nokoõnoax naiyoi nõko chaka noko soaxoxiki nõ Nios fe ipaxanõ. Nãskakẽ Niospa noko yoini iskafakĩ: “Ekeki fekäfe ëfe Fakeõnoax efe yorafo ixikakĩ,” ixõ noko yoini. Nãskaxõ a noko yoiyoni keskara noko inãxii. [16-17](#) Iskaratĩa afara fetsa ë mato yoinõ mã tãpinõ. Nõ nayoxoma nõ yoitiro iskafakĩ ato yoikĩ: “Ë naano tsõa ëfe afarafo fiimãkai ïkisi ë mato tãpimayonõ,” ixõ nõ yoitiro. Nãskakẽ nã nõ yoiyomis keskafakĩ nõ nayoxoma nõko afarafo fetsafo inãpaikĩ nõ yoitiro. Akka nõ nayoamano nõko afarafo tsõa fena fitiroma. [18](#) Nãskakẽ Niosxõ Moisés afe yorafo yoini ãto yoinã inafo reteaifono imi fonõ. Akka a yoinã inafäfe imi foyamaino a ato yoiyoni keskafakĩ Niospa ato chaka soaxotrioma. [19-20](#) Taefakĩ Epa Niospa shinãmanaino Moisés israelifo keyokõi ato yoini nikanoõfo. Mã ato yoikĩ mitoxõ, nã ifi hisopo ãfe põya pishta fini. Mã fixõ fakka fake imi yafi oveja imi fakkaya osini. Nãskaxõ ifi hisopo põya pishta fixõ oveja raniya texkeani. Nãskata nã ifi hisopo põya pishta texkeata fakka fake imiki momo momo axõ nã Niospa meka kirikaki kenea a Niospa yoiyoni keskafakĩ fakka imi saa saa ani. Askatari yorafokiri fakka imi saani. Ato yoikĩ iskafayanã: “Na imioxõ mã tãpitiro Epa Niospa noko yoiyoni keskara axii. Nãskax nõ afe yorafo itiro,” ixõ Moisés ãfe kaifo yoini. [21](#) Nãskatari nã karapa pexe a méraxõ Nios kífiti Moisés imĩ saa saa ani, askatari a méranoafori keyokõi imĩ saa saa ani. [22](#) Chanõma, nã Epa Niospa Moisés yoini keskafakĩ Moisés imi saakano karapa pexe anoafó keyokõi ato chaka soaxona. Akka imi foyamaino noko

chaka soaxotiroma. Anā ano fato fetsama nōko chaka noko soaxotiro.

Cristo nōkoōnoax nani noko chaka soaxoxiki

²³ Nā anoxō Nios kīfiti karapa pexe mēranoa keskarakōifo Nios ika ari. Nāfoki ato Nios kīfixomisfāfe yoinā imi saanifo Niospa afo ōisharanō. Akka a karapa pexe mēranoa imifo sharafiano afāfe nōko chaka noko soaxotiroma. Askatamaroko nā Cristo nokoōnoax nai fistini nōko chaka noko soaxoxiki. Noko chaka soaxonano Nios ika ari nō katiro, a keskara shara afe ipaxakī. Askatari anokai a anoxō Nios kīfiti karapa pexe keskarama. A Nios ika ano sharafinakōia. ²⁴ Akka yorafāfe karapa pexe fanifo anoxō Nios kīfinōfo. Nāskakē a mēra a Nios nai mēra ika keskarakōi ipaoni. Akka Cristo mā otoax a karapa pexe fanifo mēra ikinima. Askatamaroko Apa ari nai mēra kani. Nāskakē iskaratīa ari afe ika noko Apa Nios kīfixōfafāixiki. ²⁵ Akka nā ato Nios kīfixomis xanīfo karapa pexe kene fetsa mēra ares fisti xinia fisti akax ikipaoni a mēraxō Nios kīfixiki. Āfe imikōiya a mēra ikitamaroko, yoinā imiya ikipaoni. Akka Cristokai ato keskarama. Akai mēxotaima natiroma, nai fistini Apa Nios ari kaxiki. ²⁶ Akka askakatsaxakī Cristo nokoōnoax nai ranā ranākerana nā Niospa mai onifanichāi. Akka askamisma. Jesūs nai fistini īkisi noko keyokōi chaka soaxoxiki. ²⁷ Akka keyokōi nō nai fetsexii. Nō naax keyokōi nō akiki nokoaito noko yoixii a nō niyoxō amis keskara. Nāskakē a nō amis keskara noko yoiaino nā Jesūs Ifofaafo tii afe isharapakenakafo. Akka nā nikamisfoma omiskōipakenakafo mēra ato potaxii. ²⁸ Cristo āari ināmeax noko naxōi fistini. Yora ichapafōonoax

omiskōixō noko nāxoni. Askafiax anā ãfe yorafoki oxii, noko īkisharapakexakī. Nāskakē anā nokoōnoax nanakama noko chaka soaxoxiki. Askatamaroko aōnoax nō isharapakenaka.

10

¹ Niospa Moisés yoini keskaraōxō nō tāpitiro Cristo noko afarasharakōi faxoxiai. Nāskakē nā Moisés ato yoini keskarakai tsoa imasharatiroma. Afia Moisés ato yoini keskafakī nā xinia tii a ato Nios kīfixomisfāfe yoinā inafo retepaonifo Niospa ato chaka soaxonō. Askatari a Moisés yoini keskaratokai ato imasharamisma Nios fe īpaxanōfo. ² Akka a ato Nios kīfixomisfāfe yoinā inaoxō ato chaka soaxonaifono, tsōa anā ak'eranama yoinā ina retekī. Æfe chakaōxō anā shināchakakeranama. Nāskakē anā tsōa yoinā ina retekaranama. ³⁻⁴ Akka askarama. Nā xinia tii cabra ato retexonaifotīa nā afara chakafamis keskara ato shināmapaonifo. Akka yoinā ina imioxō ãfe chaka ato soaxotiroma.

⁵ Nāskakē Cristo mai ano fotoyoxoma Apa yoini iskafakī:

Epa, mīkai fichipaima yoinā ina imioxō ãto chaka soanōfo. Askatamaroko yorakōi mīa ea onifani ēfe yora ē mia inānō. Nāskaxō yorafoōnoax naxō ē ato chaka soaxoxiki. ⁶ Akka yorafāfekai mia inimamakanima yoinā ina retekaxō kooakī mī ato chaka soaxonō, ixō yoini. ⁷ Akka anā mē mia yoia iskafakī:

Mē nono mai ano fotoa a mīa amapaiyai keskara ē axiki. Nānorikōi mī meka yoimisto eōnoa yoikī keneyoni,

ixō Cristo Apa yoini. ⁸ Efe yora mīshitchi, shinākapo. Cristo Apa yoikī taefani iskafakī: “Epa, mīñxō Moisés ato yoini keskara sharafiano mī anā fichipaima. Akka nāato ato yoikī iskafani: ‘Yoinā inafo retekāfe āfe imi foano aõxō Niospa mato chaka soaxonō,’ ixō ato yoini. Akka a yoinā retexō koakaxō mia ināifāfekai afāfekai mia inimamaima,” ixō Apa yoini. ⁹ Nāskaxō anā yoikī iskafani: “Epa, ē nono mai ano ē fotoni a mā amapaiyai keskara axiki,” ixō Apa yoini. Akka Cristo noko nāxoni noko chaka soaxoxiki. Nāskakē a Moisés ato yoini keskara nō anā nikatiroma nōko chaka Epa Niospa noko soaxonō. Nāfo mā Niospa fetsafaa. ¹⁰ Nāskakē a Apa amapaiyai keskai Jesucristo ãari ināmeni noko nāxoxikī aõnoax nō a keskara shara inō. Nāskakē nō anā afaa fetsa fichipaima māmāi Jesús noko nai fistixonikē.

¹¹ Akka a atoõxō Nios kīfixomisfāfe pena tii yoinā ina retepaonifo Epa Niospa keyokōi ato chaka soaxonō. Askafekēkai afāfe ato chaka soaxopaonifoma. ¹² Akka Jesucristo mā noko nai fistixoní noko chaka soaxoxiki. Nāskakē nō anā afaa fetsa yopanakama noko chaka soaxonō. Nāskakē mā nokoõnoax naax Apa Nios ari kani ariax afe xanīfokōi ikikai. ¹³ Akka mā Apa ari kanixakī iskaratīa arixō manai, a noikaspamisfo Apa Niospa ato potaitīa. Nāskakē Jesucristo Apa fe xanīfokinakōia ixii. ¹⁴ Nāskakē ãarifi ināmei fistixō noko nāxoni nōko chaka noko soaxoxiki. Nāskaxō nō Ifofaax a keskara shara nō ixii. Nāskakē Niospa anā afaa chaka nōkoõnoa ūipakenakama. Nāskakē nōri a keskara sharakōi ixii.

¹⁵⁻¹⁶ Nānori Niospa Yōshi Sharapa noko yoiyonī

iskafakī:

Efe yorafāfe, ea Ifofaifono āto shinā mēra ēfe meka ē nanexii āto ōiti mērari a ēfe meka kenea keskara ē faxii ea Ifofasharanōfo, ixō yoini. ¹⁷ Nāskaxō anā yoikī iskafani:

Mā ea Ifofaino ē anā shināpakenakama a mā chakafamisfo, ixō Niospa Yōshi Sharapa yoini. ¹⁸ Akka mā noko chaka soaxonano, nāskakē nō anā yoinā ina inātiroma noko chaka soaxonō.

Nios fe rafesharakōikāfe

¹⁹ Efe yora mīshtichi, nāskakē nō nai mēra ikitiro Nios ano ranotama Jesucristomāi nokoōnoax nai imi fonikē, noko chaka soaxoxiki. ²⁰ A ato Nios kīfixomisfo kīfiti pexefā kene fetsa mēra xinia tii ikifistipaonifo ato Nios kīfixoxikakī. Anā iskaratīa nō yopatiroma askara. Anā askafapanakama. Akka iskaratīa afara fetsa fenasharakōi Jesús noko axoni. Nāskakē mā Jesús naino nā Nios kīfiti pexefā kene mēranoa sama nāmīfā faxet-tani anā tsoa ikiyamanō. Nāskakē nākōi nā Nioskōi nō kīfitiro. ²¹ Nōko Ifo Jesús nokoōxō Apa Nios kīfixomis xanīfokōi. Nāskakē keyokōi Niospa fakefāfe āto Ifokōi. ²² Nāskakē nō Jesús chanīmara fakē nā noko nāxonioxō nōko ōiti fena sharakōi noko faxotiro. Nāskaxō a nō afarafo chakafamis keskarafo anā nō shinātiroma nōko ōiti inimakōitiro. Nāskaxō faka sharapa nashimana keskara noko fatiro anā afaa chaka nōko shinā mēraxō nō shinānōma. Nāskakē Nios fe rafekāfe. ²³ Akka nō yoikī iskafamis: “Jesús nōko Ifokē Epa Niospa a noko yoiyoni keskara noko axoxii,” ixō nō yoimis. Nāskakē afaa fetsa shināyamakāfe. Nā nō shināi fisti shināfafāikāfe. ²⁴ Akka Epa Niospa

noko sharafamis. Nōri nō shināsharanō afeskaxō nō fetsafo shināmasharatiromākī nōinā faatanākaxō afara axoshara faatanānōfo. ²⁵ Mā mā tāpia mā Jesús chaima oi. Akka fetsafo anā ichanāmisfoma. Nāskakē ato keskara iyamakāfe. Nāskakē ichanāi xateyamakāfe. Jesúsnoa mā shināi keskafakī fetsafori yoitaifakāfe mātō ōiti inimasharakōinō.

²⁶ Fatora fētsa mā tāpia Jesús nokoōnoax nani nōko chaka noko soaxoxiki. Nāskara mā tāpifixō afara chakafakī nōko Ifo Jesús kachikiri fakī, askarakai Niospa āfe chaka soaxotiroma. ²⁷ Nāskarafo Niospa ato omiskōimaxii. Akka Niospa ato ōiaino ratei finakōixikani. Nāskakē Niospa ato yoixii iskafakī: “Emakinoax omiskōipakenakafo mēra fotakāfe, chiifā mēra,” ixō ato yoixii. ²⁸ Akka fētsa nā Moisés yoini keskara nikakaspakī afara chakafaito fētsa ōixō xanīfo yoimis. Fistichi yoiyamakī rafeta yoitiro, askayamakī trespa yoitiro iskafaki: “Mā nō ōia nato afara chakafaito,” ixō yoitirofo. Nāskakē xanīfāfe yoitiro: “Na feronāfāke afara chakafaa mā natiro,” ixō yoitiro. ²⁹ Akka nā Moisés yoini keskara nikakaspaiifo afo retepaonifo keskafakī fatorafāferi Jesús nikakaspamisfokē Niospa ato omiskōimakī finakōixii. Nāskakē nā yora chakafāfe shinākī iskafamisfo: “Mē nikamis Jesús ea nāxoni. Nā naino āfe imi foni. Nāskaxō ea katoni aōnoax ē Niospa fake inō. Akka ē shināikai afama. Nāskakē ē Jesús Ifofapaima,” ixō anori shinākī nāato Niospa Fake nikakaspakōimis. Askara meka yoikī Niospa Yōshi Shara chakafakī mekafamis, Niospa Yōshi Sharapa sharafafiamisno noikī. ³⁰ Akka mā nō tāpia Niospa yoikī iskafani: “Afara chakafaifāfe

ẽ ato omiskōimaxii,” ixõ yoini. Askatari yoikĩ iskafani a kirika keneano: “A ea Ifofaafäfe afara chakafaifono ẽ ato omiskōimaxii,” ixõ yoini. ³¹ Akka fatorafäfe nõko Ifo Jesús kachikiri fakaxõ afara chakafariafaifono atonã fäsi mesekõi ixii. Nãskakẽ askarafo nã Nios nãpanakato ato achixõ ato omiskōimakĩ finakõixii.

³² Shinãkapo efe yora míshtichi. Mä taeфакї Jesúsnua tãpixõ mä Ifofani keskafakї shinãmakiyamakäfe. Fetsafäfe mato Jesús Ifofatimaifono ato nikatama mä nõko Ifo Jesús Ifofasharakõipaoni. ³³ Nãskaxõ mä Jesús Ifofasharaaito õikakĩ fetsafäfe mato ïchayanã mato omiskõimamisfo. Akka a Jesús Ifofamis fetsafori omiskõiaifono märi ato fe omiskõipaimis. ³⁴ A Jesús Ifofaa fetsafo karaxa mëra ato ikimanifo. Nãskakẽ mä ato noiyanã ato inimamapai karaxa mëranoa mä ato õikai kani ato shinãmasharata ato inimamaxiki. Nãskatari nã Jesús Ifofaafäfema mäto afarafo mato fiakĩ keyokõinifo. Mato askafafiaifono a shinãchakatamaroko mä tãpini Epa Niospa nã ika arixõ mato afara mekexona afokai fenopakenakama. Nãskara tãpiax mä inimakõini. ³⁵ Nãskakẽ a mä Jesús chanõmara faa keskafakї kachikiri fayamakäfe. Mä kachikiri fayamakẽ Epa Niospa mato sharafaxii noko yoiyoni keskafakї. Nãskaxõ afara shara mato inãxii. ³⁶⁻³⁷ Akka Niospa meka keneni iskai:

Cristo mä chaima matoki oi, samarakaima, ixõ kenenifo. Nãskakẽ mä Jesús Ifofasharai keskafakї omiskõifikї tenekäfe. Epa Niospa mato inãpaiyai keskara aõxõ nã mato yoiyoni keskara mä fixii. ³⁸ Nãskaxõ anã Niospa meka kenenifo

iskafakī yoikī:

Nā ea chanīmara fai ē imasharaito, nāato ea Ifofasharakōixii. Akka nā ea kachikiri faafoki ē inimaxima, ixō Niospa yoini kirika keneano. ³⁹ Nāskarafāfe Jesús kachikiri fakanax omiskōipakenakofo mēra fokani. Akka nōkai askarama. Askatamaroko nō Jesús chanīmara fakōimis noko nimasharapakex-anō nō afe ipaxaki.

11

Nios nikakōipaonifo

¹ Akka nō Epa Nios chanīmara fakōixō a noko yoiyoni keskara noko axoyoamano nō chanīmara fai chipomāi noko axōfaito. Nāskarifiakī a noko yoiyoni keskara nō ōiyamafixō āfe mekaōxō nō chanīmara fai. Nāskara nō shinākī nō Nios chanīmara fai. ² Nāskakē nōko xinifāfe Niospa ato yoini keskara chanīmara fakōipaonifo. Nāskakē Epa Nios atoki inimakōikī atoōnoa meka shara yoini.

³ Akka nō chanīmara faxō nō tāpitiro Niospa āfemekapa mai yafi nai onifani. A nō ōiyomisfoma afarafo Niospa onifani, akka iskaratīa mā nō ōitiro. Nāskakē āfe mekapas keyokōi onifani.

⁴ Ē mato yoinō nikakapo mā tāpinō a nōko xinifo ipaonifo afe keskaramākī. Nōko xini Abel Nios chanīmara faxō oveja fake ināni nā Niospa yoini keskafakī. Nāskakē Nios akiki inimakōini. Akka āfe ochi Caínkai askara inānima. Nā Caín Nios nikakaspayanā āfe afarafo ināpaiyaito Niospa fichikaspani. Akka āfe exto Abel Nios chanīmara fakōikē Niospa aōnoa yoikī iskafani: “Mī ea chanīmara fakōina,” ixō yoini. Abel Nios chanīmara faax

mā nafianikē nō Abel shinākī nō tāpitiro Nios chanīmara faxō nō nikasharakōitiro. Nō askafaino Nios nokoki inimasharakōi.

⁵ Nōko xini Enoc aatori Nios chanīmara fakōinax afe rafekōipaoni. Nāskakē nayamafiakē a ika ari Niospa ifirisafatani. Aōnoa yoikī Niospa meka kenenifo iskafakī: “Ē Enoc yoiai keskafakī ea nikakōimis. Nāskakē ē akiki inimakōi,” ixō Niospa yoini. ⁶ Akka nō Nios nikayamakī nō Nios inimamatiroma. Akka nō Nios fe ipaikōikī nō nikakōitiro. Iskaratīa Nios nia. Nāskakē nō chanīmara fatiro Niosmāi nikē. Askatari nō nikapaikōikī chanīmara fayanā akiki nokoaito Niospa noko afara shara faxoxii.

⁷ Nōko xini Noéri Nios chanīmara fakōipaoni. Nāskakē Niospa Noé yoikī iskafani: “Ē oi kaya imai faka faipafanō āsai fetsenōfo. Nāskakē kanōanāfā pexeya fafe. Mī fakefo fe mī āfinō ano ikanax āsaxikanima. Nā ē mia yoiai keskafafe,” ixō Niospa Noé yoini. Akka tsōa askara ūiyomisma nāskakē Noé chanīmara fakī kanōanāfā fani āfe fakefo fe āsaxikima. Nā Noé Nios chanīmara faax isharakōipaoni. Akka nā nikakaspaifo askapaonifoma, afāfe afara chakafapaonifo. Nāskakē Niospa ato omiskōimani āsanōfo. Nāskakē Nios fe Noé rafeaito akiki inimakōini.

⁸ Nōko xini Abrahamri Nios chanīmara fakōipaoni. Nāskakē Niospa Abraham yoikī iskafani: “Nā ē mia nīchipaiyai ari mī katiro. Ē mia mai inānō mīnā inō,” ixō Epa Niospa yoini. Akka Abraham tāpia inima fakiri kaimākai. Askafiax nā Niospa yoia keskakōini. ⁹ Nāskakē nā Niospa yoiyoni keskara chanīmara faax, a Niospa nīchia mai ano nokoax Abraham yora fetsafo mēra kani.

A keskarafo inima. Nānoax pexe keskara a karapa pexe fofāsafapaoni a mēra oxaxikaki. Nāskakēri āfe fake Isaaca fe āfe fafa Jacobo nā keskara mēra ipaonifo. Epa Niospa Abraham yoini keskafakī nā raferi ato yoikī askafani: “Ē mato māto mai ināxii,” ixō yoini. ¹⁰ Nāskakē Abraham manapaoni. Akka Niospa yoini keskara nā mai ano ifiaxō tāpipaoni a Nios ika ari afe ipanaka. Nāno Niospa onifanifo keyokōi sharakōifo nāfori āfenā ipanaka. Nāskakē Abraham manapaoni.

¹¹ Niospa Abraham yoini iskafaki: “Mī āfi Sarapa chipo fake fixii. Āfe fake feronāfake ixii. Nāskakē mī fenafo ichapakōi ixikani,” ixō yoini. Akka Abraham anifokōi ini āfe āfiri yōxfokōi ini fake fimisma. Nāskakē Abraham āfe shinā mēraxyō shinākī iskafani: “Epa Niospa ea yoiyoni keskara ea axōi. Nāato nā yoiay keskarakōi famis,” ixō Abraham Nios chanīmara fani. Nāskakē Abraham āfinī fake fini, āfe fake feronāfake. Nāskakē Abraham fakeya ini. ¹² Akka Abraham mā anifokōia ini. Nāskano āfe fenafo ichapakōifo ini. Tsōa ato tanātiroma. Nā fishifo tiikōi askatari nā mashi exe tiikōi inifo tsōa ato tanātiroma. Abraham āfe fenafo ichapakōi inifo.

¹³ Nā ē yorafoōnoa mato rama yoia keskara atoōnoa ē mato yoinō. Nā yorafo nai mitokomenifo a Niospa ato yoiyoni keskara fikanaxma. Akka askafikaxō chanīmara fakakī ato shinā mēraxyō oa ōiai keskara fanifo. Nāskakē inimakōinifo. Nāskakanax yoinānifo iskakani: “Nonokai na mai ano nō ipanakama, mai fetsa ano nō ixii,” ikax yoinānifo. ¹⁴ Akka nānori yoiaifāfe nō tāpitiro nāskara yorafo nono mai ano

ipaitama Nios ika ari fopaikani afe ipaxakakī. ¹⁵ Akka a ipaonifo ano shinākani āto mai ano anā fopaikani fokeranifo. ¹⁶ Akka āto mai ari fopai atama Nios ika ariroko shinānifo ari nokopaikakī. Nāfāfe tāpinifo Nios ika ari sharafinakōia. Nāskakē Epa Niospa a ika ari ato pexe shara faxoni afe īpaxanōfo. Nāskakē Niospa atoōnoax inimakī ato yoikī iskafani: “Ēfi māto Nioski,” ixō atoōnoa yoini inimayanaā.

¹⁷⁻¹⁸ Anā Abrahamnoa ē mato yoinō. Epa Niospa tāpipaini Abraham chanīmara fakī nā yoia keskara akimākai. Nāskaxō yoikī iskafani: “Mī ina ea retexotamaroko mī fake fisti Isaaca ea retexōfe,” ixō yoini. Nāskatari Epa Niospa taefakī Abraham yoiyoni āfe fake fisti Isaacaōnoax āfe fenafo ichapakōi ixiaifo. Nā afara sharafo Niospa Abraham yoiyoni keskafakī āfe fake Isaacaōxō keyokōi axoxixakī tāpimayoni. Nānori Niospa Abraham yoiaino āfe fake fisti retexō Nios inākerani. Nāskaxō Nios chanīmara fakōixō nā yoini keskakōi fani. ¹⁹ Nāskaxō Abraham āfe shinā mēraxō shinākī iskafani: “Epa Niospa ea yoia iskafakī: ‘Mī fake Isaaca ea retexōfe,’ ea faito ē shinā Niospa afama mīshti fatiro. Akka ēfe fake nafiakē Epa Niospa samama ea otofaxotiro,” ixō shināni. Chanīma, āfe fake nakerani. Nāskakē Abraham shināni āfe fake nafiakē Niospa otofaxotiro.

²⁰ Akka Isaaca nāatori Nios chanīmara fakōipaoni. Nāskakē āfe fake feronāfake rafe yoini a inōpokoai: “Jacobo yafi Esaú, chipo Epa Niospa afara shara mato faxoxii,” ato fani.

²¹ Nāskarifiakī Jacobori Nios chanīmara fakōipaoni. Nāskakē mā chaima naito Niospa

ãfe shinā mēra shināmanai keskafakī ãfe fafa rafe, José fake rafe, Niospa ato shara faxonōpokofai ato yoini. Ato yoita ãfe chatiki mēstexō Epa Nios kīfiyanā aicho fani.

²² Nā Joséri Nios chanīmara fakōipaoni. Nāskaxō mā chaima nakī ãfe yorafo yoikī iskafani: “Chipo Epa Niospa nōko fenafo nā israelifo Ejipto anoa ato iyoxii kiki. Fokakī ëfe xaori foxikani kiki. Nā ikaifo ano ea maifaifoxikakī,” ixō ato yoiyoni.

²³ Moisés ãfe apa feta ãfe afa Nios chanīmara fakōipaonifo. Nāskakē Moisés yomeax sharapishtakōikē ãfe apa feta ãfe afa ōini. Nāskaxori tāpinifo mā yosixō a Niospa yoiai keskara yonosharakōixiaito. Nāskakē Ejipto anoa xanīfāfe ato yoini a israelifāfe ãto fake feronāfake yome mīshti keyokōi ato rētekī mitokakōinōfo. Askafiaifono Moisés ãfe apa feta ãfe afa Nios chanīmara fakaxō ratekakima tres oxe anifo ãto fake onekakī xanīfāfe ãto fake rēteyamanō.

²⁴ Moisés ãfe chata keskara ini Faraón. Askafafiaifono Moisés askara fichikaspani. Nāskaxō ato yoini iskafakī: “Xanīfo Faraónkai ëfe chatama. Æfe fakerikai ëfe efama,” ixō ato yoini, chanīmara fanōfo israelifo ãfe kaifo ini. Moisésri Nios chanīmara fakōipaoni. ²⁵ Akka Moisés shināni iskakī: “Ē Ejipto anoax xanīfāfe pexe ano ikax ēri ato fe inimasharakai xini ranā ayanā ē afara chakafatiro Nios shināyamakī. Ē askapaima,” ixō shināni. Askapaitamaroko iskafakī shināni: “Ēkai ejiptofo feta afara chakafapaima, askakimaroko ëfe kaifo fe nā Niospa inafo omiskōiaifo keskai ēri ato fe omiskōi. ²⁶ Ē Ejipto anoafō ato afara

fīapaikī ē ato fīakerani. Ē fīaxoma, ea mekafafiaifono Egipto anoafāfe, nāskanō. Akka afarafoyafiax shara. Akka Cristo, a Niospa noko nīchixii noko ifinō, nā sharafinakōia. Ē Cristoōnoax omiskōfiano Epa Niospa a ika arixō ē nokoaito afara sharakōi ea ināxii ē afe īpaxanō,” ixō shināni.

²⁷ Akka Nios chanīmara fakōinax Ejipto anoax āfe kaifo fe Moisés kani. Ejipto anoax āto xanīfo akiki ūitifishkifiaino akiki mesetama nā xanīfāfe mai anoax kani. Akka Nios tsōa ūiyamafitirono Moisés fisti Nios fe rafekōiax afemekapaoni. Nāskakē nā Niospa yoini keskafakī enepaonima. ²⁸ Akka Ejipto anoax israelifo foyoaafomano Niospa Moisés yoini iskafakī: “Mī kaifo yoife ovejanā fake retenōfo. Nāskakaxō nā oveja imi āto pexe fepotiffo raish anōfo, askafafono ūiki ēfe ījirinī āto fake iyoafō rēteyamanō, nā Ejipto anoafō āto fake iyoafō ato reteaitīa,” ixō Niospa yoini. Nāskakē Moisés nā Niospa yoia keskara chanīmara faxō āfe kaifo israelifo yoini. Nāskakē israelifāfe āto fake iyoafō nanima.

²⁹ Nāskakē israelifāfe Nios chanīmara fanifo. Nāskakaxō nā fakafā āfe ane ūshi pokefainifo. Epa Niospa nēxpakīa fakafā shināfatatanaino israelifāfe pokefainaifono ato acho Ejipto anoafō fonifo ato retepaikani. Mā fakafā nēxpakīa kāiyaifono Niospa atoki fakafā yosifani. Nāskakē ūsai mitokomenifo.

³⁰ Akka Niospa israelifo yoini: “Nā Jericó pexe rasi kachiori siete nia foaketi fayakenōfo,” ixō yoini. Nā pexe rasi kachiori simīto kene keyakōi masoa ini. Nāskakē israelifāfe a pexe rasi kachiori foaketi fayakenaifono nā Niospa yoini keskara nā pexe rasi maokomei fetseni. ³¹ Akka keyokōi

Jericó anoafo nai keyonifo. Akka nā kēro chotaferoma ãfe ane Rahab nā fisti nanima nāatomāi mā Nios chanīmara faax. Akka Jericó pexe rasi ano foyoafomano israeli xanīfāfe feronāfake rafe nīchini ato onāti fatanōfo. Mā foafono nā rafe Rahab ãfe pexe mēra ato ikimani tsōa ato fichixō reteyamanō. Nāskakē nā Rahab tsōa retenima ãfe kaifo retefikakī.

³² Akka, ¿anā afaa fetsa ē mato yoitiromē? Nā yora ichapafāfe Epa Nios chanīmara fapaoni-foōnoa ē mato yoikī keyotiroma. Nā Gedeón ikaino, Barac ikaino, Sansón ikaino, Jefté ikaino, David ikaino, Samuel ikaino nā Niospa meka yoimis fetsafoōnoari ē mato yoipanā ēkai yoikī keyotiroma. ³³ Nāskakē afāfe Epa Nios chanīmara fakaxō ãto sorarofo yoinifo a ato noikaspaifo ato retenōfo. Nāskakē a ato noikaspaifo ato retepaifikakī finōkōinifo. Akka atiri xanīfo ikaxō ãfe yorafo kexesharapaonifo isharanōfo. Nāskakē a Niospa ato yoiyoni keskara ato axosharani. Nāskatari atiri nā Nios Ifofaafāfema poomā mēra ato potanifo. Askafiaifono Epa Niospa ato kexesharani poomānā ato pinōma. ³⁴ Akka atiri xanīfo chakafāfe ato yoinifo chiifā mēra ato potanōfo. Chii mēra ato potafiafono Niospa ato kexesharani koonōfoma. Atiri kenofāfe ato retepaifikakī tsōa ato retenima. A isinī ikani ato yora pachikōifokē afori Niospa ato mitsiskōi imani. Nāskakē nā ato noikaspaifāfe ãto sorarofāfe ato retepaifiaifono nāfāferoko ato īchonifo ato afeskafanōfoma. ³⁵ Kērofāferi Nios Ifofaino, fake naano Niospa ato otofaxoni anā ninō.

Akka fetsafo Nios chanīmara fakōinafono

nā Nios Ifofaifāfema ato omiskōimanifo ato retekakī. Nāskaxō ato yoikī iskafanifo: “Mā Nios Ifofayamaito nō mato afeska faima mā kasharatanō. Akka mā Ifofaito nō mato retei,” ixō ato yoinifo. Ato askafafiaifono tsoa Nios shināmakinima. Nāskakē ato retenifo ato reteyoafomano shinākī iskafanifo: “Noko retefiaifono Epa Niospa samama noko ūtovatiro nō afe ūpaxanō,” ixō shinānifo. ³⁶ Askatari a Nios chanīmara faa fetsafori ato kaxemetsamafayanā ato koshaketsayanā ato cadenānā metexkere ata ato otexkere axō ato karaxa mēra ikimanifo. ³⁷ Askatari ranāri tokirinī ato tsakaketsakaxō ato retenifo, ranāri sirochonō nakirafe ato xatenifo nanōfo, ranāri kenopa ato retenifo, ato askafaifono. Nāskakē nā afaaamaisfāfe ano rapatiyamano oveja fichi iyamai cabra fichi rapati fakaxō safenifo. Ato retepaikakī ato ūchorifaifono. Nāskakē omiskōikōinifo. ³⁸ Nāskakē tsōa istoma anoax machi keya anoax a mafa kini mēra ikikata mai kini mērari ikinifo. Akka nā Nios chanīmara faafo a Nios Ifofaafāfema ato shara fanifoma Niospa ato ūia sharafiafono, ato chakafapaonifo.

³⁹ Nāskakē nāfō omiskōi finafikakī Nios Ifokōi fapaonifo. Nāskakē Niospa atoōnoa yoikī iskafani: “Nafāfe ea nikakōikani. Nāskakē ē atoki inimakōi omiskōifikani isharakōimisfo,” ixō Niospa atoōnoa yoini. Askafikaxō a Niospa ato yoiyoni keskara tsōa fiama ini. ⁴⁰ Nāskakē Epa Niospa ato manamayopaoni. Akka nōri nō Nios chanīmara faax nō ato fe a Jesús ika ari nō nokoxii. Nāskakē yora fisti keskara nō ato fe ixii a keskara shara noko imaino. Nāskaxō ato feta anā afaa fetsa nō yopapakenakama. A Niospa yoiyoni keskara keyokōi noko ināxii nai mēraxō.

12

Nō Jesúsn̄oa shināsharatiro

¹ Akka nōko xinifāfe Nios chanīmara fapaonifo. Nāskakē nōri ato keskara nō itiro. Nāskaxō a afara chakata noko nētefapaiyai keskara nāfo nō kachikiri fakōini. Nāskaxori afara chakafāferi samamakōi noko afara chakafamapaitiro. Nāfo chakari nō kachikiri fakōini a Niospa noko amapaiyai keskara fisti axiki, fena fenakima a noko yoiai keskara nō axosharakōi. ² Akka nō Jesús fisti shināfafāinō. Nāfi nōko Ifokōikī noko tāpimamiskōi. Akka nāato noko ōimakī taefanikī afara afeskara afaino nō Nios chanīmara fakōinō. Nāskaxō a Apa yoia keskara akōipaoni. Nāskakē nōri a keskara inōkāfe. Nāskaxō mā mastakakī yorafāfe fero-taifi rāfinī fanifo. Askafafiaifono omiskōiyanā tenekōini māmāi tāpiax a chipo xanīfo ixō Apa Nios feta noko ifixiai inimakōiyanā Apa Nios ika arixō.

³ Yora chakafāfe chakafafiaifono tenekōini. Nāskaxō a nokoōnoax omiskōini keskara shinākī matori omiskōimanafono, shināchakatama māto ōiti fekaxtefayamakāfe. Nāskaxō a Niospa mato amapaiyai keskara mā enetiroma. ⁴ Akka yorafetsafāfe mato afara chakafamapaimisfo anā mā Jesús Ifofanōma, ato nikatama mā omiskōifi mā omiskōi sharamisma. Akka Jesúsrōko omiskōi finakōini. ⁵ Mā mā shināmakia keskara ē anā mato yoinō. Mā āfe fakekē, Epa Niospa mato yoini keskara āfe meka kirikano kenea iskara fētsa keneni:

Ēfe fāke, ēfi mī Ifokōikī. Akka nā ē mia yoiai keskara mī ayamaito ē mia omiskōimanī mī ea nikanō, mī ea Ifofasharanō. Ē mia

askafaino, akai afamara mī fatiroma. Askatari shināchakayamafe. Tāpisharafe. ⁶ Nā ē aō noiai tāpimasharai aō noikī. Ēfe fake keyokōi omiskōimani anā nikasharanō, ixō keneni a Niospa shināmanaino. ⁷ Epa Niospa mato tāpimapaiyai keskara tāpikāfe. Nāskax omiskōifiki shināchakatamaroko tenesharakōikāfe. Nāskakē omiskōixō mā tāpitiro māmāi Niospa fakefoxō. Apafāfe āto fakefo tāpimatirofo keskafakī Epa Niospa mēstekōi nokori tāpimani. ⁸ Keyokōi Epa Niospa āfe fakefo ato tāpimanaito mā meemisfo. Akka Epa Niospa noko tāpimayamaino nō āfe fakekōifo itiroma. Nāskax nōri āfe yorafo itiroma. ⁹ Akka nō yomekē nōko epafāfe nono mai anoxō noko tāpimapaoonifo. Nāskakē nō shinākī nō ato nikakōimis. Akka Epa Niospa noko tāpimanaino nō tenekōitiro. Nāskaxō nā noko tāpimapaiyai keskai nō inimayanā nō isharakōitiro. ¹⁰ Nōko epafāfe āa shinākaxō noko tāpimamisfo nō shara inō. Akka mā nō yosiano anā noko askafamisfoma. Nāskarifikī Epa Niospa mēste shināsharakōikī, nokori shara fapaikī noko tāpimamis a keskara shara nō inō. ¹¹ Chanīma, noko tāpimayanā noko omiskōimanaino nō shara meetiroma. Paekōi mei nō ichopaitiro. Askafixō mā yosixō chipo nō shinātiro Epa Niospa noko tāpimasharai, nōko ūti inimasharatiro shara noko imaino.

Nō Niospa meka nikakaspaino mesekōi ixii

¹² Nāskakē afara afeskara afiaino shināchakayamakāfe. Epa Niospa mato tāpimapaiyai keskara fisti akāfe. Nāskaxō Nios Ifofakī kachikiri fatama nikasharafafāikāfe. Nāskatari āfe meka shara nikakī enepaiyamakāfe. Yora pachi

keskara iyamakāfe. ¹³ Nāskax isharakōikāfe Jesús Ifofasharaxikakī. Mā askaito ōikani nā Jesús Ifo sharafaafoma mato fe rafepaitirofo Jesús keskara shara ipaikani.

¹⁴ Nāskakē mēenāpaitama keyokōi yorafo fe isharafafāikāfe. Nāskatari Jesús keskara shara ipaikāfe. Akka tsoa Jesús keskara shara iyamakaní afāfekai nōko Ifo ūinakafoma. ¹⁵ Epa Niospa noko noikōikī āfe Fakeoxō noko sharafafafāimis. Nāskakē a Niospa noko amapaiyai keskara akāfe fenoxikakima. Askatari māto shināmā afaa shināyamakāfe. Akka māto shināmā mā afara shinākī fetsafori mā ato afara chakafamatiro akairi askara anōfo. ¹⁶ Nāskatari māto āfima fe iyamakāfe. Kērofori māto fenema fe iyamakāfe. Akka nō naino, nōko fake iyoato nōko afama mīshti fitiro. Akka Esaú shināsharanima. Fonāikī āfe exto yōkani āfe ēxto pimanō. Nāskaxō a āfe apa ināpaiyai shinākima āfe exto yoini iskafakī: “Epa naano āfe afama mīshtifo ē fiai ē mia inānō kopifikī,” ixō yoini. Nāskakē nā Esaú keskara iyamakāfe. Atokai Niosnoa shināpaonima. Akka a Niospa mato ināpaiyai keskara fikaspakīma, fikāfe. ¹⁷ Mā mā tāpia āpa afara shara ināpaiyai keskara fipaiflikī finima. Nāskaxō apa yōkakī iskafani: “Epa, a mīa ināpai keskara ea ināfe, ē mī fake iyoakōi,” ixō oiaiyanā yōkafaito āpa inānima māmāi chipokoto fiano. Nāskakē ūisharakāfe. Mā Nios nikayamai māri Esaú keskara itiro. Nāskakē Niospa mato ināpaiyai keskara mā fitiroma.

¹⁸ Epa Niospa a nōko xinifo yoini keskara iskaratīa noko yoimisma a keskara. Ato yoini machi āfe ane Sión tenāmā fotanōfo anoxō afara

fetsa ato yoixiki. Akka nā machi anoax chiifā erepafākōi, askatari kōi fakishifākōi, askatari nēfefākōiyānā kana piishini. ¹⁹⁻²⁰ Nai mēranoax maneti fāsikōi chāi chāisaito nikanifo. Nāskatari nai mēraxō fāsikōi ato yoiaito nikanifo ato Niospa iskafaito: “Na machi ano tsōa māpetiroma. Māpeaifāfe tokirinī ato tsakakī retekāfe. Askatari yoināfāferi māpeaito mā retetiro,” ixō ato yoiaito nikanifo. Nāskakē ratekōikakī Moisés yoinifo iskafakakī: “Moisés, nō anā Niospa meka nikapaima. Māchi ari māpei nō narisatiro. Nāskakē Nios yoife noko anā yoiyamanō,” ixō israelifāfe Moisés yoinifo. ²¹ Akka Moisésri nā ōia keskara ato yoini iskafakī: “Ēri fāsi ratekōi, tari tari iki,” ixō ato yoini.

²² Akka nōkai machi Sión ano nō kaima. Askatamaroko machi Sión fetsa ano nō kai, āfe ane fetsa nā Jerusalén Fena ano a Nios ika ari. Nāskakē nānoax āfe ājirifo ichanākaxō, “Nios sharara,” fafafafāikani. Akka nā āfe ājiri ichapakōifo tsōa ato tanātiroma. ²³ Nānori nō keyokōi a Jesús chanīmara faafo afe ixii. Akka nā Nios ika ari āto anefo kenea afe īpaxanōfo. Nāskakē nōri nō Nioski nokoa. Nāskakē noko yoixii fatofāfe Ifofakanax afe ipanakafomāki. Nā Ifofaafos a keskara shara ato nai mēraxō imai afaa chakafamisfoma keskara inōfo. ²⁴ Jesús noko nāxoyamanō tsōakai nokoōnoax nāxoyonima. Nāskakē iskaratīa Jesús noko nāxonikē nō Nios fe isharapakexatiro. Akka nōko xini Caín onefetsa Abel reteni. Nāskakē Epa Niospa Caín yoikī iskafani: “Caín, ¿afeskakī mī exto mī reteamē? Iskaratīa ē mia omiskōimani,” ixō yoini. Abel nafianixakī aato noko nimapaketiroma,

Jesús keskarama. Akka Jesús nanixakī noko nimapakenaka.

²⁵ Nāskakē Niospa mato yoiai keskara nikakaspayamakāfe. Nā nono mai anoxō nōko xinifo Moisés ato yoini keskara nikayamaifāfe Epa Niospa ato omiskōimani. Akka Jesús Moisés keskarama. Nios ika ariax nokoki fotoni Niospa Fakekōiax. Nāskakē a Jesús noko yoiai keskara nō nikayamaito nokori omiskōimakī finakōixii. ²⁶ Akka Epa Niospa Moisés yafi nōko xinifo machi Sión anoxō ato yoikī āfe mekapa mai naya naya ani. Nāskaxō anā ato yoini iskafakī: “Anā mai fisti ē naya naya axima. Nairi ē naya naya axii,” ixō ato yoini. ²⁷ Nāskakē nā Epa Niospa noko yoini keskaraōxō nō tāpitiro nā afara nipatirofoma, Niospa nāfo yamafarisafataxii anā afaa inōfoma. Akka nā Niospa ato imapaiyai fisti itirofo. ²⁸ Nāskatari a Nios ika ariax mai naya naya itiroma. Nāskakē nāno nō afe isharapakexatiro. Nāskakē aōnoa nō shināsharayanā nō kīfifafāinō. Nāskaxō a noko amapaiyai keskara nō axōaino nokoki Epa Nios inima sharakōixii. ²⁹ Akka mā nō tāpia nōko Ifo Nios nā chiifā erepafāi keskara. Akka nā āfe meka shara nikakaspakī kachikiri faifono Niospa chiifā erepafāi mēra ato potaxii anoax omiskōipakexanōfo. Nāskakē nō nikasharakōinō.

13

Afeskaxō nō Nios inimamatiromē

¹ Māfi Cristo afe yorafokī. Nāskakē mā ranā nōināi xateyamakāfe. ² Yora fetsafori mai fetsa ariax oaito māto pexe anoxō ifisharakāfe.

Nāskakēri tāpixoma fetsafāfe yorayama fiano ājirifo fiano ifimisfo.

³ Nā karaxa mēra ikafori ato shinākāfe. Nāskaxō ato ōiti inimamasharakāfe. Askatari ato axosharakāfe. Nā mā ato fe karaxa mēra ika keskara shinākōikāfe.

⁴ Feronāfakefo, māto āfīfe fe nōināsharakāfe. Nāskax isharakāfe. Askatari māto āfīma fe ipaiyamakāfe, māto āfi fisti fe ikāfe. Kērofori māto fenema fe ipaiyamakāfe, māto fene fisti fe ikāfe. Akka nā āto āfīma fe ikaifono, kērofori āto fenema fe ikaifono, nāskarafo Niospa ato omiskōimaxii.

⁵ Akka kori ichapa noiyamakāfe. Askatamaroko inimakāfe afe tii mā ayamakī. Epa Niospa yoinikī iskafakī: “Ēkai mato makinoax paxkanakama. Askatari ē mato potanakama. Nāskakē a mā yopai ē mato ināxii,” ixō yoini. ⁶ Nāskakē chanīmakōi nō yoitiro iskafakī:

Afara afeskara afiaito ēfe Ifāfe ea axomis. Nāskakē ē rateima, Epa Niospamāi ea kexesharaino yorafāfe ea afeskafanōfoma, ixō nō yoitiro.

⁷ Niospa meka yoimisfāfe mato yoinifo keskara atoōnoa shināfafāikāfe. Nāfāfe mato shara famisfo. Nāskakaxō nōko Ifo Jesús chanīmara famisfo. Nāskakē ato keskara ikāfe nō Jesús Ifofasharakōinō.

⁸ Akka Jesucristo nā ipaoni keskara īpanaka. Anākai iskaratīa fetsatiroma. ⁹ Akka fetsafāfe mato anorima yoipaikani, a tsōa nikamisma keskara. Nāskakē ato nikayamakāfe mato iskafakī yoipai ani kiki: “Nōko xinifāfe noko yoinifo keskara nō nami fetsa piaino nōko shinā mēra noko shināmasharatiro,” ixō mato yoipai ani

kiki. Akka a nō piaitokai nōko shinā mēra noko shināmasharatiroma. Askatamaroko Niospa noko noixō noko imasharatiro a keskara shara nō inō.

¹⁰ Nāskakē nō chanīmara famis Jesucristo ifi cruz ikakinoax noko nāxoní nōko chaka noko soaxoxiki. Akka Jesucristo chanīmara fatama nā Moisés ato yoini keskara fisti chanīmara famisfo. Nāskakē afāfekai ato chaka soaxotirofoma.

¹¹ Akka nā Moisés ato yoini keskai a ato Nios kīfixomis xanīfo fisti, ares fisti pexe kene fetsa mēra ikipaoni, nā mēra yoinā ina imiya ikikē ūikī Epa Niospa ato chaka soaxonō. Akka nā yoināfāfe ato kaya pexe rasi pasotaixō koofapaonifo.

¹² Nāskarifiai Jesús Jerusalén pasotainoax noko omiskōixokī āfe imi foax noko nāxoní nōko chaka noko soaxoxiki a keskara shara nō inō. ¹³ Akka nōri Jesús ipaoni keskara inōkāfe a nō ipaoni keskara anā ixikima. Nāskakaxō āfe kaifāfe potanifo keskafakī nokori nofe yorafāfe potatirofo. Nāskakaxō Jesús īchaketsanifo keskafakī nokori aōxō īchatirofo. Akka Jesúsnoa chaka shināmisfo keskafakī nokori aōxō chakafatirofo. ¹⁴ Nono mai anoax nō omiskōifikī nō shināchakaima, mā nōmāi tāpiax nono mai ano nō ipanakama. Askatari mā nō tāpia a Nios ika ari nokoax nō afe ipanaka. Nāskakē nā nō manasharamis.

¹⁵ Jesús noko nāxonioxō nō Epa Nios aicho fai. Akka nō yoikī iskafatiro: “Aicho Epa Niosi, mī Fafe Jesús ēfe Ifokōi. Aōxō ē mia aicho fai,” ixō nō yoitiro. ¹⁶ Askatari ato shināmakiyamakāfe mā afarayaxō a afaamaisfo ato ināsharakāfe. Mā ato askafaito ūikī Nios matoki inimasharakōi kiki.

¹⁷ Akka nā ichanāti pexe anoxō Niospa meka mato yoimisfo ato nikasharakōifafāikāfe. Nāskax

nā mato yoiaifo keskakōikāfe. Nāfāfe mato kexesharamisfo mā Jesús nikasharanō. Akka nāfāferi tāpiafo Nios ari nokoaifāfe ato yōkaxii iskafakī: “¿Mā ēfe meka mā ato tāpimasharamismē?” ixō ato yōkaxii. Nāskakē ato nikasharakāfe inimakōinōfo. Akka mā ato nikayamaino inimatirofoma, shināchakatirofo. Nāskaxō mato axosharatiroma.

¹⁸ Nokori Epa Nios kīfixokāfe. Epa Niospa noko amapaiyai keskara mā nō apaimiski. Nāskaxō nōko shinā mēraxonō nō afaa chaka shināima. Nō isharapaikōi. ¹⁹ Eari Nios kīfixokāfe matoki ea samama nīchinō ē anā mato fe inō.

Ato Nios kīfixoyanā mā mekai xatekī ato yoini

²⁰⁻²¹ Epa Niospa noko inimamakōimis nō afaa shināchakanōma. Nōko Ifo Jesús mā nokoōnoax nafiakē Apa Niospa otofani Jesús keyokōi finōax noko kexemis inō. Jesús noko nāxoniōnoax Epa Nios fe nō afe yora ipanaka. Nāskakē mā afara shara yopaito Epa Niospa mato inātiro a mato apaiyai keskara shara mā anō. Āfe Fake Jesucristoōxō nōko shinā mēra noko shināmasharax nokoki inimakōixii. Nāskakē keyokōichi Jesúsnoa nō yoisharapakenaka. Nāskara sharakōi īpanaka.

²² Efe yora mīshtichi, nā ē mato ichapama yoia keskara nikasharakāfe fena fenakākima. Nā ē mato kenexona keskai māto shinā mēra mato shināmasharaxii kiki. ²³ Ē mato yoipai mā nofe yorashta Timoteo iskaratīa karaxa mēranoax mā tsekeia. Akka samamashta ekeki oano ē afe kai mato ari.

²⁴ Keyokōi ichanākaxō a mato Niospa meka yoixomisfo yafi a mato kexemisfori nō ato

yoisharai. Akka nono Italia anoxori nā Nios Ifofaafāferi mato yoisharakani.

²⁵ Epa Niospa keyokōi mato noikī mato shara faxōfafāinō. Nā tii.

**Niospa meka fena Jesucristoõnoa
New Testament in Yaminahua (PE:yaa:Yaminahua)**

copyright © 2008 Wycliffe Bible Translators, Inc.

Language: Yaminahua

Translation by: Wycliffe Bible Translators, Inc.

Yaminahua [yaal], Peru

Copyright Information

© 2008, Bible League International. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Yaminahua

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2018-11-16

PDF generated using Haiola and XeLaTeX on 11 Nov 2022 from source files
dated 29 Jan 2022
6c7b7ce2-9d87-5405-91e6-71ce1387adcc